

**AirAsia QZ8501: Mayat rakyat Malaysia diterbang ke tanah air**  
**The Malaysian Insider**  
**Feb 11, 2015**

Penantian keluarga rakyat Malaysia yang terbabit dalam insiden AirAsia QZ8501 pada 28 Disember tahun lepas berakhir, apabila jenazah Sii Chung Huei diterbangkan ke Kuching, Sarawak hari ini.

Jenazah Sii berlepas dengan pesawat C-130 penerbangan ihsan Tentera Udara Diraja Malaysia (TUDM) dari Landasan Udara Angkatan Laut (Lanudal) Tentera Nasional Indonesia di Juanda pada 10.40 pagi tadi.

Turut menaiki pesawat itu isteri Sii, Wong Muk Ngiik bersama dua anaknya serta beberapa anggota keluarga lain dan diiringi seorang pegawai dari Kedutaan Malaysia di Indonesia.

Duta Besar Malaysia di Indonesia Datuk Seri Zahrain Mohamed Hashim berkata, mayat Sii ditemui pada 5 Februari dan dikenal pasti menerusi ujian DNA dua hari lepas sebelum diserahkan kepada warisnya semalam.

Katanya, Wong datang semula ke Surabaya pada 6 Februari sebaik sahaja mendapat tahu pihak berkuasa Indonesia menemui beberapa lagi mayat.

Wong dan beberapa anggota keluarganya sebelum itu berada di Surabaya selama lebih sebulan sejak hari kejadian pada 28 Disember tahun lepas untuk menunggu pencarian mayat suaminya.

"Kami berterima kasih kepada TUDM dan AirAsia yang banyak membantu bagi memudahkan kerja-kerja menguruskan dan menyerahkan jenazah kepada waris Sii serta membawa mayat dan waris ke Kuching di Sarawak," kata Zahrain kepada pemberita di Surabaya, hari ini.

Turut hadir mengiringi jenazah Sii di Lanudal ialah isteri Zahrain, Datin Seri Che Mahani Ismail.

Sii, 56, seorang ahli perniagaan berasal dari Kuching dan berpangkalan di Jakarta merupakan rakyat Malaysia tunggal yang berada dalam pesawat malang yang terhempas sejurus berlepas dari Surabaya ke Singapura pada pagi 28 Disember lepas.

Pesawat itu membawa 162 orang dan setakat ini sebanyak 102 mayat ditemui dan pihak berkuasa juga menemui kotak hitam pesawat itu dua minggu lepas.

Operasi mencari mayat masih diteruskan oleh Badan SAR Nasional (Basarnas). – Bernama, 11 Februari, 2015.

Source:

<http://www.themalaysianinsider.com/bahasa/article/airasia-qz8501-mayat-rakyat-malaysia-diterbang-ke-tanah-air>